

Minister Michelle Hooyboer-Winklaar:

Na ningun momento balor di nos diplomanan ta core peliger

Gobierno di Hulanda ta positivo cu proceso di “aanscherping exameneisen” di Aruba

MINISTER Michelle Hooyboer-Winklaar a tuma nota den algun medio di prensa di informacion completamente erroneo cu a keda publica tocante e balor y reconocimiento di nos diplomanan di HAVO/VWO. Minister Hooyboer-Winklaar ta lamenta cu e medionan di comunicacion cu a publica esaki no a informan nan mes bon prome cerca e instancianan concerni prome cu a publica e informacion. Lastimamente e medionan a basa nan mes completamente riba un carta di un directiva di scol, esta directiva di Colegio Arubano, sin busca pa confirma esaki cu Gobierno di Aruba, Gobierno di Hulanda of cualkier Universidad na Hulanda. Minister Hooyboer-Winklaar ta haya e acto aki di e directiva di scol hopi irresponsabel, mirando cu ta mal informa comunidad y ta causa panico innecesario cerca hobennan y mayornan. Minister Hooyboer-Winklaar ta mira esaki como un tactica

pa desvia atencion for di e plan di e scol pa cera porta pa mas estudiante di MAVO.

Minister Hooyboer Winklaar ta garantisa cu na ningun momento e balor of reconocimiento di nos diplomanan ta na peliger. E titular di enseñansa ta menciona cu e proceso di aanscherping exameneisen HAVO/VWO ta wordo guia den un forma responsabel y cu Ministerio di Enseñansa, Cultura y Ciencia di Hulanda (OCW) den un reaccion preliminar ta reacciona positivo cu e stapnan cu Aruba a tuma y ta tumando pa por sigui garantisa e “gelijkwaardigheid” di e diplomanan di HAVO y VWO.

Na aña 2012 Aruba a firma un protocol cu Minister di Enseñansa di Hulanda riba diferente tereno incluyendo e parti di e examen y diplomanan di HAVO/VWO. Na e momento ey Aruba tabata e unico di e demas islanan di reino cu a firma e protocol mustrand asina cu Aruba ta pro activo y cu nos tin un compromiso serio cu e calidad di nos enseñansa. Mientras tanto Sint Maarten tambe a firma un protocol similar cu esun entre Aruba y Hulanda/OCW. Aruba y Hulanda a palabra un introduccion di e cambionan den fase pa asina duna Aruba e espacio pa na un manera responsabel por defini kico precies mester ahusta y na ki manera lo haci e ahustacionnan necesario.

Na November 2013 Departamento di Enseñansa a comunica un parti di e ahustacionnan aki caba den cuadro di

aanscherping di exameneisen HAVO/VWO. Den e carta di Departamento di Enseñansa ta poni especificamente e ahustacionnan y termino di implementacion di e cambionan pa ambos HAVO y VWO. Pa por completa e proceso di aanscherping exameneisen a instala na comienso di aña un comision AVO bou di guia di Departamento di Enseñansa y cu participacion di e diferente partners pa asina haya input di tur esunnan concerni y pa discuti y defini hunto e cambionan cu ainda ta necesario pa Aruba.

E comision AVO ta consisti entre otro di representantenan di Examenbureau, Afdeling Curriculum Ontwikkeling, Avond-Havo, Colegio San Nicolas y Colegio Arubano. E resultado di e comision aki ta un proposicion cu a ser presenta na Minister Hooyboer-Winklaar na juni ultimo y cu a ser sosteni pa e mandatario. Un carta oficial hunto cu e proposicion y un descripcion di e proceso a ser manda pa Director General di OCW na Hulanda dia 26 di juni ultimo. Den espera di e reaccion oficial di Hulanda a tene diferente “video conference” cu Ministerio di OCW caminda cu Hulanda ta mustra cu nan ta hopi positivo cu e stapnan cu Aruba ta tumando. A base di e carta cu Aruba a manda tabata tin peticion for di Hulanda pa algun informacion adicional y mientras tanto a facilita OCW cu e informacion necesario. Ministerio di OCW ta indica cu nos por ricibi reaccion oficial di nan parti den transcurso di e dlanan nos dilanti pero ya nan ta duna “greenlight” pa

nos sigui cu e proceso cu nos ta bezig cune.

Nos a compronde cu e directiva di scol cu a ocasiona tur e conmocion aki no ta respeta e palabracionnan haci den e comision AVO ni tampoco e liñanan di comunicacion existente. Nan kier mas influencia den e decisionnan cu ta wordo tuma y ta busca contacto directo cu Minister di Enseñansa y hasta cu Ministerio di OCW na Hulanda. Minister Hooyboer-Winklaar mientrastanto a manda un carta pa e directiva di scol aki mustrand nan riba nan luga den e asunto aki. Minister Hooyboer-Winklaar ta bisa den e carta cu ta reconoce e rol importante di e directiva di school como un di e stakeholders den e proceso aki, pero cu finalmente ta Ministerio di Enseñansa y Departamento di Enseñansa ta responsabel pa maneho di enseñansa pa pais Aruba.

Pa mas informacion Minister ta referi e directiva di scol bek na nan mesun representantenan den e comision AVO pa asina nan por pone nan mes na altura di e ultimo desaroyonan y palabracionnan haci. Tambe Minister ta duna e directiva di school den e carta e conseho pa haci bon palabracion interno riba e parti di comunicacion y compartimento di informacion

mirando cu ta dunando e impresion cu internamente mes nan no ta riba un linea.

“Colegio Arubano ta scoge pa pone enfasis solamente riba ki porcentahe di estudiante ta slaag na Colegio y drenta enseñansa superior na Hulanda y ta link esaki cu e nivel di capacidad ora nan drenta Colegio Arubano. Pues miho e estudiante ta manera nan yega Colegio, mas chens nan tin pa slaag y sigui studia na Hulanda. Nos ta kere cu tur estudiante cu demostra potencial merece e mesun chens ey, esey ta e tarea di Colegio Arubano. Si Colegio Arubano pone e focus riba prepara hobennan miho durante nan añanan na scol, mas mucho lo ta exitoso. Como un scol cu ta uza fondonan publico, decisionnan di e scol no por ta den man di e scol so, si no ta cuadra cu interes general di nos pais.”

E mandatario a bisa finalmente.



STATEN VAN ARUBA

OPENBARE VERGADERING
OP 24 SEPTEMBER 2014
OM 09:00 UUR V.M. IN DE
VERGADERZAAL VAN DE
STATEN VAN ARUBA

TE BEHANDELEN
ONDERWERP

AGENDA:

Ontwerp-landsverordening tot
vaststelling van het saldo van de
exploitatie-rekening over het
dienstjaar 2012 (ZJ 2013-2014-788)

De Plv. Griffier,
drs. J.I. Williams